

Regional News Unit AIR Aizawl
Saturday, June 22, 2024

Date – 22/06/2024

REGIONAL NEWS BULLETIN

HEADLINES (MORNING)

- Cyclone Remal avanga Mizoram hmun hrang hrang a chhiatna thleng endik turin Sawrkar laipui tirh, 'Inter-Ministerial Central Team' chu Mizoramah an cham mek.
- Zoram Medical College (ZMC)-ah Mizoram-a la tih ngai loh Thin Cancer Zaipui hlawhtling taka zai a ni.
- Prime Minister Narendra Modia chuan Yoga chu inpumkhatna siamtu a ni a ti.
- Khawvel hmun hrang hrangah Yoga Day hman a ni

<><><>

CENTRAL TEAM VISIT CYCLONE REMAL HIT AREAS

Cyclone Remal avanga Mizoram hmun hrang hrang a chhiatna thleng endik tur a Sawrkar laipuiin a ruat, 'Inter-Ministerial Central Team' chuan Mizoram an rawn thleng a,

Nimin khan Sairang, Sairang Dinthar leh Sihhmui a tui lian vang a chhiatna hrang hrang an endik nghal a ni.

Central Team-ah hian Pu Adelbert Susngi, Regional Officer, MoRTH, Pu Rajeev Singh, SE, Ministry of Jal Shakti, Pu Moti Ram, Assistant Commissioner, Rural Development-te an tel a, Chhinchhiah danin May ni 28-a Remal thlipui avang khan Sairangah chenna in 28 tuiin a chim pil a, in dinglai 10 tui lian hian a khawih chhe tel a. Heng zingah hian Zirna in, Mosque leh Mandir a tel a ni. Sihhmuiah hian tui lian hian lawngleng 12 a la bo a, balu lakna kawng te tichhiain tlawng kam a nul siam thahnem tak a tichhe bawk a ni. Sairang Dinthar vengah hian chenna in 12 leh zirna in 1 tui lian vang hian a chhe bawk a ni.

Inter-Ministerial Central Team-te hian an cham chung hian Greater Aizawl Water Supply Scheme Phase I & II, Melthum/Hlimen leimin te, Kulikawn leh ITI veng thlanmual te, ZMC Falkawn leimin hlauhawm lai te, Aizawl - Aibawk -Darlung inkar kawng te, Durtlang leh Kanan veng thlanmual te leh Zawlpui zau, Serchhip te hemi an tlawh dawn a ni.

Nimin tlai khan PHE Minister Prof Lalnilawma chuan a office chamber-ah Inter Ministerial Central Team te hi a kawm a. Minister hian Central Team te chu Cyclone Remal avanga Mizoram hmun hrang hranga chhiatna thleng chungchang te a lo hrilhfiah a. A bikin a department kaihnawih - PHE, Horticulture leh Rural Development Department kaihnawih a harsatna thleng chungchang te a sawipui.

Greater Aizawl Water Supply Phase -I a chhiat vek thu leh a khawl te repair tura thawnchhuah a nih thu a sawi a. Tui thianglim mamawh ang pump chhoh a theih loh avanga mipuiin harsatna an tawh te sawiin central team chu an thil hmuh te behchhan anga Mizoram in mamawh Central Sawrkar hnena a thehluh te pawh a theih anga chak a lo enzui sak an mamawh tih a hrilh a ni.

Meetingah hian DM&R Secretary bakah concerned Department aiawhin Secretary, E-in-C, Director leh official pawimawh te an tel a ni.



CRIMINAL LAW

Saitual DEF hnuaiia Police te chuan July thla aṅanga India ram pumin a an hman tawh tur, IPC, CrPC leh Indian Evidence Act thlakna tur *Bharatiya Nyaya Sanhita, Bharatiya Sakshaya Adhinyam leh Bharatiya Nagarik Suraksha Sanhita* chungchang zir chianna leh sawihona training, SP conference Hall Saitualah nimin khan an nei a,

Addl SP Pu J. Lalrokima, Dy SP (HQs) Pu R. Lalzarliana leh O/C Saitual Police Station Pu NG Lalchamlia training hi an pe a, training ah hian Saitual Police Station, Ngopa Police Station leh Phullen Beat Post aṅangin officer leh staff mi 31 an tel a ni.



ZMC

Zoram Medical College (ZMC)-ah Mizoram-a la zai ngai loh Thin Cancer Zaipui hlawhtling taka tih a ni a,

Hemi chungchanga sorkar thuchhuah tarlan danin, Thin Cancer hlawhtling taka zaitu team te hi Surgeon Dr. Samuel Lalhruaizela, Associate Professor leh Assistant Surgeon Dr. Willie Lalhruaitluanga, Assistant Professor, Department of Surgery-te an ni a, Head of Department-te rawn chungin tha takin an zai a ni. Anni bakah hian Junior Doctor leh Nursing Staff thiam tak takten an pui a, ICU lamah Anaesthesiology team ten damlo te hi tha tak leh uluk takin an enkawl bawk a ni.

Thin leh Mit Cancer te hi 'Cancer rau rauah pawh zai harsa leh huphurhawm' tih a ni thin a. Mizoram-ah phei chuan zai theih loh deuh thawa ngaih a nih avangin phai lamah mi tam tak kalpui an ni thin a. Hun eng emaw atang khan regular takin Mit cancer hi Zoram Medical College (ZMC)-ah an lo zai thei tawh a, case eng emaw zat zai tawhin, mi tam takin an dampui tawh a ni.

ZMC-ah hian cancer chi hrang hrang an zai nasa em em tawh tih sorkar thuchhuan chuan a sawi a, damlo tam takin Doctor-te kaltlangin Pathian tihdamna an chang tawh a. Golden Card hmangin a thlawn vekin damlote hi enkawl an ni a, heng bakah hian Healthcare leh sawrkar MR bill theih zawng zawng pawh kalpui mek a ni bawk.



APEX BANK NEW BRANCH

PWD Minister Pu Vanlalhlana'n Mizoram Co-operative Apex Bank Ltd. (MCAB), Durtlang branchninin khan a hawng a.

Hawna inkhawm hi M. Suaka Auditorium neih a ni a, thusawiin Pu Vanlalhlana chuan Durtlang leh a chhehvel mipuite tan malsawmna thlentu a nih ngei a beisei thu a sawi a. MCAB chu Mizoram Bank a nih anga khawtlang mipuiten tangkai taka hmang thin turin sawm a. Mizorama bank hrang hrang awm zingah an pawisa hmuh atanga Mizoram mipuite hnena luangchhuak tha ber chu Mizoram Cooperative Apex Bank a nih thu sawiin, Deposit atanga Loan pekchhuah tehna CD Ratio pawh zaa 78 lai a nih thu a sawi.

Mizoram Co-operative Apex Bank Ltd. (MCAB) hi July ni 31, 1982 ah din a ni a, bank zawng zawng zinga Mizoram mipui leh sawrkar-in neitu nihna za a za (100%) a neihna Bank awmchhun a ni a, Deposit vaibelchhe 1,508 neiin Loan vaibelchhe 1,172 pek chhuah a ni. MCAB Durtlang Branch hawn tak hi Apex Bank branch 28-na a ni a, ATM dah nghal tura ruahman niin reiloteah hawn theih an inbeisei a. Aizawl khawpui chhungah Branch 13 neiin Aizawl pawnah branch 15 an nei mek a ni. ATM booth 35, mobile van ATM 2 (Lunglei & Mamit) chhiar telin an nei a, kumin chhung hian Branch thar 8 hawn hman an tum bawk a ni. MCAB hnuaiyah a ngheta thawk mi 173 an awm mek a, Provisional Employee 30 awmin private security guard 90 an chhawr bawk a ni.



CHAMPHAI DCC

Champhai District Consultative Committee (DCC), District Level Review Committee (DLRC) leh District Level Security Committee (DLSC) chu an Chairman, Champhai District Bawrhsap Pu James Lalrinchhana hovin Champhai DC Conference Hall-ah ninin khan an thu khawm a. Financial Inclusion chungchang leh ramdang nena insumdawn tawnaah India pawisa a tam thei ang ber hman a nih theih dan tur te an sawiho.

Thutkhawm kaihruihu Pu James Lalrinchhana chuan District Consultative Committee chu thutkhawm pawimawh tak, District sumpai che vel nghawng a ni, a ti a. Mipui leh bank-te inkarah thawhhona tha zawk awm se, banking system changtlung leh tha zawk pawh awm zel se a duh thu a sawi bawk a ni.

He thutkhawm hi a bik taka Financial Inclusion ngaihtuahna tur Special meeting a nih angin thutkhawm hian Financial Inclusion kaihnawihn thil hrang hrang - Financial Literary Camp buatsaih dan te, District chhunga ATM bun a nih tawh dan te, March 2025 hmaa District zawng zawng Digitize tum a nih thu te, Digital Payment hman tlemna khua tihmasawn dan tur te leh Telecom Service hmanga Financial Inclusion kalpui dan te thlirhoin an sawiho a. Hei bakah hian Champhai District chhunga Financial Inclusion kawnga la hnufual khua te chu Bank Branch hrang hrang ten chan insemin, hma an sawn theih nan hmalakna lo nei theuh se tiin an rel a ni.

He hunah hian Pu Mrinal Giri, Manager & Lead District Officer, RBI chuan ramdang nena insumdawn tawnaah India pawisa – INR a tam thei ang bera hman a nih theihna atan a ruahmanna awm te a sawi a. Mizoram chu state lian ni lo mah se, ram pahnih – Bangladesh leh Myanmar te nena ramri nei a nih avangin state pawimawh tak a ni, a ti a. Indian Rupee a tam thei ang ber hman a nih theih nan Bank-te chu sumdawng ten Special Rupee Vostro Account an neih theih nana hma lo la theuh turin a ngen a ni.

He thutkhawmah hian DCC member - Sawrkar department aiawhte, Sub Hqrs YMA aiawhte leh District chhunga Bank hrang hrang aiawhte an tel a ni.

<><><>

HNAHTHIAL MZP

Hnahthial MZP Headquarters chuan Gov't Hnahthial Higher Secondary School-a zirtirtu indaih lohna kara zirtirtu sawn chhuah sutna leh Principal sawn chhuaha, School awm chilh theitu mi hrisel pangngai sawrkar a an ngenna thu lawmawm an dawn loh avangin Gov't. Hnahthial HSS-a zirtirtute office kai tur nimin khan an dang a.

June Ni 18-a School Education Department-in Transfer Order ngaihtuah tha leh tura thu a chhuah chu, Transfer Order sutna a nih loh avang leh Principal sawn chhuah a, a dang dah tura an ngennain awmzia a awm loh avangin Schoolkai tur hi dan a ni.

Mizoram Sawrkar, School Education Department-in an beisei leh duh te a tih hlawhtlin hma chu Gov't Hnahthial Higher Secondary School zirtirtu leh zirlaite hi kar leh atangin dan chhunzawm tuma ruahmanna siam a ni, an ti.

<><><>

KHAWZAWL KVK

Rabung khuaah KVK Khawzawl buatsaihin Tomato chin leh thar chungchangah Farmers' Scientist inkawmhona nimin khan neih a ni a.

He hun hi Dr. Malsawmkimi, Senior Scientist & Head chuan kaihruaiin zirtirna a pe nghal a, kuthnathawktu mi 53 an kalkhawm a ni. He huna kalkhawmte hnenah hian IIHR (NEH) hnuai a mi Tomato chi sem nghal a ni bawk. He huna kalkhawmte hian an Tomato chin chungchanga an harsatna tawhte leh hlawk zawka an thar chhuah theih dan tur te an sawiho a ni.

Rabung khuaah hian chhungkaw engemawzatin eizawna atan nasa takin Tomato chingin hma an la a kum 2023 atanga vawin thleng hian quintal 600-700 inkar an seng tawh a ni.

<><><>

YOGA DAY

Prime Minister Narendra Modia chuan Yoga chu inpumkhatna siamtu a ni a ti. Social Media-ah a thudahah Pu Modia chuan Yoga vangin hnam hrang hrangte an insuihkhawm a, thalai tamtakin phur taka Yoga session-a hun an hmang chu lawmawm a tih thu a sawi. Pu Modia chuan Yoga Day vawi 10 na chu khawvel pumah hman a ni tih sawiin he hun hmang tura inpe zawng zawng te chungah lawmthu a sawi a. Yoga ti lar tura thawktute chungah lawmthu a sawi bawk a ni.

Puan tawh angina nimin khan ramchhung leh rampawnah International Yoga Day urhsun taka hman a ni a. A hmanna pui ber chu Prime Minister Narendra Modi-a hoin Jammu and Kahsmir-a Srinagar-ah butasaih a ni. PM Modia chuan Sher-i-Kahmir International Conference Centre (SKICC) ah mipui 7000 chuang kal khawmte chu a huhoin Yoga a tihpui a. He hunah hian &K Lieutenant Governor Manoj Sinha, Union Minister Prataprao Ganpatrao Jadhav leh mi pawimawh tak takte an tel a.

Prime Minister Narendra Modia chuan thusawiin taksa, rilru leh thlarau than zel nan Yoga a pawimawh a ti a. Khawvel pumah Yoga ti thin an pung zel tih sawiin a that zia hi miten an hmuh belh zel a ti a. Khawvel ramdang hruaitu a kawm zingah Yoga chungchang sawipui lo an vang hle a ti bawk.

<><><>

YOGA DAY

Khawvel hmundangah pawh Yoga Day hi hman a ni a. Bangladesh ah chuan High Commission buatsaihin Dhaka-a Shaheed Suhrawardy Indoor Stadium ah Yoga Day hman a ni a. High Commissioner Dr. Binoy George chuan Yoga chu mi ti pumkhat tu, taksa hriselna chawilartu leh rilru hriselna pawimawhzia zirtirtu tha tak a ni a ti.

Dubai-ah pawh Yoga Day hi hman niin Dusit Thani ah Art of Living Foundation te huaihawtin hman a ni a. UAE-a Yoga lar chhoh zel dan leh a pawimawh ziate he hunah hian tarlan a ni.

International Yoga Day hi Nepal ah pawh vawiin khan hman a ni a. Kathmandu-a Idnian Embassy chuan he hun hi buatsaihin Pokhara ah hun hman a ni a.

USA-ah chuan New York khawpui lunlai leh hmingthang Times Square ah International Yoga Day hi hman a ni a. Mi sing 2 chuang an pungkhawm a, he hunah hian Yoga session pasarih lai neih a ni a. India Consulate General leh Times Square Alliance tangkawp chuan he hun hi an buatsaih a. He hunah hian Consul General Binaya Pradhan chuan Yoga in taksa leh rilru lam hriselna a thlen theih hrang hrangte tarlangin nungchate nena inrem taka khawsakhona a nih thu a sawi a ni.

Sri Lanka ah pawh International Yoga Day hi Galle Fort ah hman a ni a. Mi 300 chuang an kalkhawm a ni.

<><><>